

## La lum te la ousc del cher

Prejentà te Ciasa de Paussa l Calandèr Ladin 2018

L'à per titol "La lum te la ousc del cher", l nef Calandèr Ladin, e l'à ence n sot titol: "n percors per descorig a na vida più fona nesc veies e sie mond".

L'é nasciù da na colaborazion anter l'Istitut Cultural Ladin e l'APSP de Fascia e l'é stat prejentà apontin te la Ciasa de Paussa ai 15 de dezember, dò la radunanza de l'ICL.

I 12 retrac che caraterisea ogne meis é stac fac da Emanuela Montrasio, che te Ciasa de Paussa la laora e che te sia fotografies, apede che moscèr na gran capacità de valorisèr lumes e ombries, la sà soraldut fissèr momenc, esprescions e emozions che te chela struttura podon viver e arfièr, se sion bogn de se raportèr con respet, amor e ence con amirazion envers chi giaves, pissan a duc i egn, la esperienzes, la pascions, la fadies e i dolores che i à vivù.

Doudesc retrac che Emanuela à chierì fora, anter i centenees a la leta, apontin jan dò a n percors che taca con na picola popa de peza e fenesc con la pedies che segna l troi, acioche de etres posse ge jir dò più sorì. E per ogneun de chisc retrac Alberta Rossi, che laora te la biblioteca de l'Istitut, l'à sapù troèr fora la paroles ladines e l valorisèr con na picola frasa poetica.

L'é n calandèr particulèr, che met al luster la sensibilità de doi femenes

e la bela colaborazion anter doi istituzions de noscia val, garatèda ence de gra al sostegn de la Copratives de Fascia e de Ciampedel. Tel cors de la prejentazion, vidèda da Alberta Rossi, la legrezza per chesta colaborazion é stata palesèda da la presidenta de l'APSP de Fascia Barbara Bravi e dal president de l'ICL Antone Pollam. Emanuela Montrasio à ringrazià duc i ghesé de la Ciasa de Paussa: l'é ic - l'à dit - i veri protagonisè de chesc calandèr, e la diretora Alessia Daprà se à augurà che l posse ruèr no demò te la majons, ma ence tel cher di fascegn. En ultima l conseier Bepe Detomas à lodà l'idea de meter ensema la ressorses che laora con noscia reijes e dapò duc à podù veder amò de autra bela fotografies proietèdes, fèr mingol de festa e zachei ence vèlch bal, con la musega di Bonderes. (lg)



La autores Emanuela Montrasio e Alberta Rossi.



L Calandèr ladin 2018 à metù adum l'Istitut Cultural e la Ciasa de Paussa: doi strutures vejines che tol ite e rencura noscia reijes.